

# MARGRIET IGNACIA

Mi ta Margriet Ignacia. Mi ta un persona sosial, habri pa sera amistad i semper kla pa duna un man kaminda ku mi por. Mi a traha den diferente organisashon, e.o. MOHUYA (Movementu di Hóbennan di Jandoret).

Siendo un hóben di 20 aña mi a fungi komo sekretario. Nos tabata reuní den misa di Jandoret ku Pader Römer komo nos konsehero. Esaki tabata mi promé eksperensia.



Despues mi a sigui yuda den diferente otro organisashon.

Aktualmente mi ta miembro i alabes presidente di asosiashon Fun Walk. Fun Walk ta un organisashon di kanadó i ku tur aña den luna di aprel ta organisá un kaminata grandi. I kuminsamentu di luna òktober tambe F.W. ta organisá un kaminata grátis pa 60-plussersnan.

Un di mi hòbinan ta kana. Mi tin mas ku 30 aña kanando.

Promé ku mi a drenta den un organisashon di kanadó mi tabata kana riba mi mes 2 òf 3 biaha pa siman na koredó. Tambe mi tabata partisipá na diferente kaminatanan ku organisashon ta organisá, e.o.: Fun Walk, The Jolly

Walkers, Roadrunners Club Korsou, Go Fast, Kabrietenloop, Stichting Prinses ilhelminafonds, Brandweer Curacao ets.

Mi tabata miembro tambe di The Jolly Walkers i Roadrunners Club Korsou un tempu. Promé ku mi a bira miembro di RRCK mi tabata partisipá na kareda- i kaminatanan ku nan tabata organisá. Mi ta kòrda ku e promé biaha ku mi a partisipá tabata na e kareda di Amstelloop.

E dia ei tabata e úniko biaha ku mi a logra kore henter e ruta, saliendo for di Peter Stuyvesant College te na Fabriká di Amstel. Esei ta algu ku mi no por lubidá.

Dia 27 ougùstùs 2000 mi a partisipá na un kaminata di RRCK i mi a logra yega na e di 2 lugá den e kategoria 40-49 (hende muhé). Mi a risibí un opsekio di parti di RRCK.

Dia 20 aprel mi a inskribí mi mes ofisial komo miembro di RRCK.

Tabatin un periodo kòrtiku ku mi a fungi komo komisario den direktiva di RRCK.

Mas o ménos na aña 2005 mi a kuminsá yuda RRCK komo boluntario huntu ku 3 otro koleganan di Fun Walk, e.o.: Vivian Whiteman, Edmee Mariano i Fabiola Meulens i ami mes Margriet Ignacia.

Komo boluntario nos a risibí di RRCK un T-shirt kòrá ku pretu i un skorchi pa usa durante e karedanan.

Nos tabatin e tareanan pa yuda e partisipantenan momentu ku nan kaba di kore o kana.

Ami tabata enkargá ku kòrta patia i ofresé na e partisipantenan ora ku nan drenta bek for di kareda o kanamentu. E otro tareanan tabata

tuma e teketnan serka e partisipantenan i entreganan e.o. pida patia, bakoba, sòpi i djus ets.

Mi tabata gosa di mira kon e partisipantenan ta yega final. Muha, kansa, satisfecho i kontentu despues di nan kareda o kaminata.

Mayoria di nan ta kana bini dirèkt riba e patianan sin pasa tuma nan teketnan. Nan ta bisa ku e patia ta kita nan set, freska garganta i baha kansansio.

Mayoria di mes ta skohe kua pida patia nan ke, esun mas grandi i ku kolo mas kòrà. Tin di nan ta puntra ku nan por haña un pida patia mas o si nan por kambia e bakoba pa pida patia. Tambe tin di nan ku kièr un pida patia chikitu.

Durante e karedanan i kaminatanan mi a sosialisá i sera amistad ku masha hopi partisipante. E ambiente durante e karedanan ta "gezellig". Bo ta kòmbersá, entre kambia ideanan ku otro. Pasa prèt, hari i papia ko'i loko ku otro i pasa prèt.

Lokual ku mi a gusta mas di e karedanan ta e "modderloop" huntu e bríndis di aña. E ambiente ta hopi gezellig. Mi a yega di partisipá na e "modderloop" tabata un eksperensia dushi i otro for tur e otro kareda- i kaminatanan.